

Täkarde ta iktäb Buləs i-käl-Kuləs

Āšajəš

1 A-wa näkk, Buləs, wa ija erhet n-Mässinäy änämmaşul n-Yisa* Älmasex.* Ähuuläy-in näkk d-äñja-y däy-äddin wa s-isəm-net Timoti ²ayetma-näy wi n-iməssheddəjän n-imaydalän däy-tassayt d-Älmasex əzzäynen ayṛəm wa n-Kuləs. Ikf-iwān Abba-nänäy Mässinäy d-Emäli Yisa Älmasex ännyumät-net d-älxer-net.

Tämayit d-tittar n-Buləs

³ Wär käla hanäy-okäy ašäl d-wär nämmoy i-Mässinäy-i n-Abba n-Emäli-nänäy Yisa* Älmasex* däy-tittar ti has-nətäjj däy-təssəba-nawän. ⁴ Nətumay-as hak ašäl fäl-a-s, osän-anäy-dd isälan n-immun wa jäm s-Yisa Älmasex d-tärha ta n-tidət jäm i-iməssheddəjän. ⁵ Awen, jäm-t ed təssanäm fäl ättäma wa käwän-äsjär Mässinäy-i ihän išənnawän. Ättäma-en, mäjräd wa n-tidət ämoos Älənžil* a hawän-t-isssəslän, tomänäm sär-s. ⁶ Älənžil day wa s-käwän-in-əwwädän isälan-net, əmmək-wa-däy s-has-təsläm a-s titwəjjin isälan-net däy-äddunya iket-net, jarräwän äddinät tämudre ta täylälät däy-təssəbanet. Əmmək-wen-däy day s-takkän isälan-en s-data yur-wän, yur-ašäl wa d-hasän-təsläm, təjrähäm əddəttu wa ija ännyumät n-Mässinäy, əmmək-wen-däy day a-s təhhälän s-data däy-ifäyyän n-äkall. ⁷ Älənžil wa s-təsläm, issäyr'-awän-t Ibbafraś wa n-emärh-nänäy där-nohär əsshäyəl, ənta-i n-ämaydal ixđämän i-Älmasex däy-idäggan-nänäy-hawän. ⁸ Enta-en-däy a hanäy-ijän isälan n-tärha ta dd-işşənşär Unfas Šäddijän* däy-ulhawän-nawän.

⁹ Təssəba n-a-wen-däy a fäl näkkäneđ-däy, yur-ašäl-i-däy d-hanäy-əjjäšän isälan-nawän-däy, wär käla nässunfa däy-tamädilt n-Mässinäy-hawän, nətattär däy-s ad-käwän-äkf musnät imdan n-erhet-net, äkf-iwān day s-tärna n-Unfas Šäddijän särho d-ujreh iket-net ¹⁰ i-ad-təlmədäm əmmək wa s-əniihäjja ad-sär-s təlkəmäm i-Emäli, təjrəzäm-as däy-härät iket-net. Dihen, ad-təkrəşäm ännyu n-imärkedän iket-näsän, təhələm day s-data däy-təməzzuyt n-Mässinäy, ¹¹ təşşuhum s-tärna n-älxurmät-net, tudabem tebäddé däy-härät iket-net s-tažidert təddeewät d-tedäwit.

¹²Dăwătăt, tumayăm i-Abba-i kăwăñ-ikfăñ turhajăt n-ad-tĕjjĕshäm ānnur-net, tahərəm d-iməşseddəjän tăkasit ta hasăñ-itwăr dăy-Təmmənəyä*-net. ¹³Măssinäy, ohăy-anăy-dd dăy-tărna n-tihay n-Iblis, iwwăy-anăy s-Təmmənəyä n-Rure-s* wa ikna tărha. ¹⁴Idəm n-Rure-s-en-dăy a dăy-dd-nəjrăw əlləllu dăy-tišəm n-Iblis d-tenăşše n-ibăkkadăñ.

Wär t-illa a-s wădden uf'-e Yisa Ālmasex

¹⁵Măssinäy, wär-itətwənhiy, a-wa āmoos iket-net, itawănhay dăy-Yisa* Ālmasex*-i n-Rure-s*-i t-illăn hărwa wär t-illa a t-illan. ¹⁶Təssəba n-tărna-net ənta-en-dăy a dăy-dd-ixlăk Măssinäy hărăt iket-net, jer-a-wa ihăñ išənnawăñ wăla a-wa iwărăñ ăkall, a-wa ilăñ mănhoy hakd a-wa t-wărăñ ila; imănakalăñ, imănnăhădăñ, iməşsuha, imărnăñ, wär t-illa a-s wădden ənta a t-dd-ixlăkăñ, ənta day a-s dd-ixlăk. ¹⁷Enta a dd-ăzzarăñ i-hărăt iket-net, ənta day a ităfăñ tămudre n-hărăt iket-net. ¹⁸Enta a-s eyăf n-tayəssa ta tămoos ălkănisăt,* ənta a issənsăñ itabbăñ n-ăddunya, ənta a dd-ăzzarăñ tanăkra jer-inəmmuttan i-ad-wär-itiləs tamăttant, umas ămizăr dăy-hărăt iket-net. ¹⁹Făl-a-s, ijrăz i-Măssinäy, ad-izzăy s-a-wa āmoos iket-net dăy-Rure-s Yisa. ²⁰Enta a dd-ija Măssinäy əssəbab i-ad-izəmməzəl d-iman-net a-wa t-illăn iket-net, jer-a-wa izzăyăñ išənnawăñ wăla a-wa izzăyăñ ăkall; ašni n-Yisa wa inyălăñ a-s ătwăşlăb făll-tajəttewt a-s əssəbab n-ălxer jer-Măssinäy d-dăgg-adəm-i dd-ixlăk.

²¹Kăwăned day i s-ibda, jan-kăwăñ erk inəzjam-năwăñ d-erk imojjan-năwăñ, imăjarăñ d-işənja n-Măssinäy, ²²ăzmăzăł-kăwăñ Măssinäy ămăra-dăy d-iman-net s-tamăttant ta ija Rure-s* a-s dd-āmoos ăgg-adəm făll-ărori n-ăkall. A-wen, ij'-e dăy-təssəba n-ad-tudabem tebădde data-s şăddijăm, wär kăwăñ-iwer ălyib wăl' iyyăñ, wär t-illa day uđlem kăwăñ-iwarăñ. ²³A-wen, ad-itbət afăł wär dd-tăržem dăy-immun-năwăñ, təknəm antum dăy-s i-ad-wär kăwăñ-ăsnămăjjăj hărăt wăl' iyyăñ d-ăttăma wa kăwăñ-ăsjărăñ isălan n-Ālənžil* wi s-təslăm; isălan-en-hi, wär t-illa ere s-wădden, isl'-asăñ. Năkk day, Buləs, ij'-ahi Măssinäy ămaway n-isălan n-Ālənžil.

Ălyizabăt wa ihannăy Buləs d-tăbbillănt ta ija i-ad-tăkk ălkănisăt s-data

²⁴Ayətma-γ, ămăra-dăy, ăsidăwăt-ahi a-wa hannăyăy dăytersəmmawen fălla-wăñ ed olăh săr-i d-a-s năkk -i-dăy a hin-isimduń ălyizabăt wa hin-ođăñ Ālmasex;* ărđey s-ahăñay n-ăyana-wen-dăy dăy-təssəba n-ălkănisăt*-i tămoosăt tayəssa n-Ālmasex. ²⁵Ălkănisăt-en-dăy a-s ămoosăy ăanaxdim ed, ikkəllăf-ahi Măssinäy dăy-turhajăt-net d-ad-kăwăñ-săyrăy s-ujreh măjrăd-net iket-net, ²⁶səlmədăy-kăwăñ

s-əddärəj wa s-kăla āttunkăl iwətyan fäll-iwətyan i-äddunya iket-dăy-net măšan, ašäl-i-dăy, ăsnăfaläl-t-dd Măssinăy i-iməssheddəjän-net²⁷ wi ăsnăfrän i-ad-tän-isəlməd s-təmyäre n-ărrəzăy, d-ălxurmät n-a-wa s-kăla t-iffăr i-tiwsaten iket-dăy-năsnăt. Əddärəj-en-hi s-ašäl-i-dăy ănfaläl-dd, ălmăyna-net da: Älmasex dăy-ulhawän-năwän, a-di, tăjjăšäm təmyäre n-ănnur n-Măssinăy.

²⁸Älmasex-en-dăy a-s nəxatṭăb isălan-net, nətakkăs hak ägg-adəm dăy-taydărt, nəsayra hak ägg-adəm s-sărho ilan ujreh i-ad-dd-nəsəbdəd hak ägg-adəm iyrad, imda dăy-tassayt-net d-Älmasex. ²⁹Təssəba n-a-wen-dăy a făl ədgažăy dăy-ălxidmät wa hey, ăbbiillänăy s-tärna ta hi-ikfa Älmasex ed tärna-net a făl ăsifăllăy dăy-a-wa hey iket-net.

2 Ayətma-γ, ārheey ad-təssanäm fäll-ezăwe wa ija amjär wa hey fălla-wän, kăwăneđ d-kăl-Lăwdisa, d-ăddinät wi iyyăđnen s-wăr kăla ənhăyän idəm-in. ²A-wa hey, hey-t fălla-săń əntăneđ-dăy i-ad-ismađän ulhawän-năsăń, tasăyäm dăy-tärha s-iyvän n-ənniyăt, ənnufləyän dăy-ărrəzăy n-ănnuymät n-Măssinăy, ăkf-en musnăt imdan i-ad-udaben ujreh n-əddärəj n-Măssinăy wa s-kăla āttunkăl s-ašäl-i-dăy ănfaläl-dd ălmăyna-net; a-wen a t-ămoosăń Älmasex.* ³Ənta-en-dăy a ȳur-dd-imdă ărrəzăy wa n-sărho hakd-dăy tayette.

Hewät fălsăfa ta n-bahu

⁴A-wa, janney-awän-t i-ad-wăr kăwän-isəswid ăwadəm wăl' iyyän s-tăzude n-iləs ⁵făl-a-s, kud-kăwän-ujəjăy dăy-tayəssa-nin-dăy, ărtayăy dăr-wän s-ənniyăt-in ed tartit ta tăhuusket jäm jer-iman-năwän d-antum wa ija immun-năwän dăy-tassayt d-Älmasex,* ij'-ahi asəddəwi wa făl săr-i, şund ȳas, əlley-t ȳur-wän, hannăyăy-kăwän.

Tihusay n-tămudre ta ikarrăś ăwadəm irtayăń d-Yisa Älmasex

⁶Āmăra, ayətma-γ, şäməd tidət-dăy a-s tărđam s-Emăli Yisa* Älmasex,* adiš, ăjät-as alkum itbatän. ⁷Ājet alkum-năwän-has antum wa tăjjän ikewän n-ahəşk dăy-ăkall, umaset asəyăr wa təjrăwäm a-ăsişhen immun-năwän dăy-a-s tăsidăwäm a-wen hărkuk d-tămayit.

⁸Agəzăt iman-năwän, wăr kăwän-isəswadet ăwadəm wăl' iyyän s-tiddas n-fălsăfa dd-ikkas dăy-eyăf-net wăla s-bahutän ăsihătălnen făll-agna dd-əknan dăgg-adəm i-iman-năsăń, wăla s-a-wa făll-təgl' ăddunya, a-s ija a-wen, wăr t-illa a osay a-wen d-Älmasex. ⁹Wăr hasän-tăşjădäm. Măssinăy, a-wa ămoos, ăsbayän-anăy-t-dd iket-net dăy-Yisa Älmasex. ¹⁰A-wen-dăy a făl, a hin-tođänäm-dăy, ill'-awän-t ȳur-Älmasex-i ăminakălän făll-iməşsuha d-imărnən iket-dăy-năsăń.

¹¹Enta-en-dăy a yur-təjrăwăm amili āynayän wärän oleh d-wa tăjjän ifassän n-dăgg-adəm, ed amili wa s-Ālmosex* iman-net a-titajjän i-inət̄ulab-net, ālmäyna-net a-s, ad-təjrăwäm tärna făll-abăkkad, təkrəshäm ašäl făll-erk imojjan-năwän. ¹²Kăwăned day i omănnen s-tärna n-Măssinäy ta dd-təssənkărät Yisa* jer-inəmmuttan, ēlmədät a-s atwəsəlmay wa tătwăjjäm dăy-aman, ālmäyna-net a-s tohăräm dăr-s tamăttant. Azənjăz day wa dd-jäm ḍarät alămay-năwän dăy-aman, ālmäyna-net a-s tohăräm d-Ālmosex tanăkra ta dd-ija jer-inəmmuttan i-ad-dăr-s tărtəyäm.

¹³Kăwăned-i s-ibda jan-kăwän erk ijitän-năwän şund inəmmuttan dat-Măssinäy, ăsisalăhän-kăwän d-inəzzulam† wăren āmeläy; ašäl-i-dăy, dăy-idəm n-Ālmosex,* issənkăr-kăwän-dd Măssinäy dăy-tamăttant, ikf'-iwän tămudre tăynayät; inş'-anäy năkkăneđ hakd kăwăned ibăkkadän-nănäy. ¹⁴Ālkad wa itwărän s-ənta a făl əktabän uđlemän-nănäy dăy-isălan n-anməșri-nănäy i-fărədän d-alämär n-Măssinäy, omäs-t-in Yisa,* ikkăs-t-in s-iyyät s-tärna n-atwəsləb wa ătwăjja făll-tajettewt. ¹⁵Āzzăman wa d-ămmut Yisa făll-tajettewt, ikrăš tärna făll-iməşsuha d-imărnän, ikşaf-tän dat-tiştawen n-ăddunya iket-net, ija iyunan dăy-errawän-năsän, iwăttän data-s.

Tăbəđđawt d-a-wa făll-təgl' ăddunya

¹⁶A-wen-dăy a făl wär kăwän-isăwaret ăwadəm wăl' iyyän uđlem dăy-isălan n-a-wa tăttäm wăla a-wa săssäm; dăy-isălan n-ašäl n-ămudd s-wär təlkemäm, wăla dăy-iba n-uđəf n-tebădde n-orän; wăla dăy-isălan n-ašäl n-əssəbət-i n-tăsonfat s-wär təlkemäm. ¹⁷Hărătan-win-dăy iket-dăy-năsän, taliwen n-a dd-imalän a ămoosän. Āmăra tidət ənta tosă-dd, a tăt-ămoosän, Ālmosex.* ¹⁸Wär toyjem ăwadəm wăl' iyyän isiləbbudän tayəssa-net, ālmăt əmmək-wen-dăy a-s isaras iman-net dat-Măssinäy, wăla i iyabbădän ănjălosän, ija dăy-wän tasăja făl-a-s innin itcjj a wär tajjəm. Āddinät wi işilləw a-wen, sakafän iman-năsän, jannen s-bahu a-s a-wa tăñ-işläñ, Măssinäy a hasän-t-dd-ăsnăfalălän dăy-tăharjit, wär hasän-tăsjădäm făl-a-s inəzjam-năsän, wär-əglen ar făll-a-wa făll-təgl' ăddunya. ¹⁹Āddinät-en, wär-ənmăttafän d-Ālmosex-i ămoosän eyăf-wa ihakkän tayəssa a-wa s-tămiyatăr, ənta-en-dăy a-s əssəbab n-tassayt ta t-tellät jer-izəmmuz d-azarän, isadwal-tăt Măssinäy s-əmmək wa s-irha.

^{†2:13} — Yur-kăl-Ālyăhud, ere wärän ămoos āgg-Ālyăhud s-alăşäl mey ere wärän ilkem i-ăddin-năsän, iket-net, ănăzzalim a ămoos. A-wen-dăy a făl tiwsaten ti iyyăđnen iket-năsän, ti n-inəzzulam.

— Ašäl-i-dăy, ănăzzalim, ăkafăr (ere wärän issen s-Măssinäy).

²⁰Šāmad āmăra, toharām d-Ālmasex tamăttant dăy-isălan n-a-wa făll-tăgl' āddunya, mafăl tăyyəm dăgg-adəm sawarăń-kăwăń fărədăń wi tăggarnen āddinăt əglanen făll-a-wa făll-tăgl' āddunya? ²¹Jannen-awăń: «He kăwăneď, wär tăđkelăm hărăt wa, i lăbasăń; wär tăkrăbbem hărăt-wədi, ixăramăń; wär ăsăm hărăt-wen, wär-oley», ²²jannen a-wen-dăy a-s ija a-wen hărătăń-win-dăy iket-dăy-năsăń, wădden wăla a ənđărrăń ed wär t-illa a ənfan afăl ișwär ikš'-en ăwadəm. Dărăt-a-wen dăy, fărədăń-win-dăy, wär-ămoosăń ȳas ar a sayren dăgg-adəm, wădden Măssinắy a dd-falăń. ²³Ādduuttăt a-s fărədăń-ənnin-dăy, ănfăqqăń d-a isawađăń sărho făll-ăgg-adəm, ăssiiktăń-dd ălyibadăt dd-ifalăń ulh d-asiinən ntayəssa d-tanhađt dăy-s măšan, wär t-illa a-s ənfan ăgg-adəm irhan ad-ikrăś tărna făll-erk derhanăń wi ănnihăđnen dăy-tayəssa-net.

Tămudre ta tăynayăt tatăjrawăt dăy-Yisa Ālmasex

3 Šāmad tidēt-dăy a-s toharām d-Ālmasex* tanăkra ta dd-ija jer-inəmmuttan, adiś, əmmăyăt i-a-wa hawăń-itwär Măssinắy dăy-işənnawăń-i dăy-ăqqiima Ālmasex, ămiinakăl daw-ayil n-Măssinắy, ²ăyləbnet-kăwăń hărătăń-win-dăy hănen işənnawăń, tăyyəm fălla-wăń azənnuzjəm dăy-wi n-ăddunya. ³Kăwăneď, yur-aşăł wa d-tomăńam s-Yisa Ālmasex, tămoosăń şund āddinăt ămmuutnen dăy-isălan n-a-wa făll-tăgl' āddunya, tămudre ta tăynayăt tăjrăwăń, tohar d-ta n-Ālmasex atunkăl yur-Măssinắy. ⁴A-wen-dăy a făl aşăł wa dd-mad-infiləl Ālmasex-i ămoosăń tămudre-năwăń, ad-dăr-s dd-təmzəyyim anfiləl dăy-ălxurmăt-net.

⁵Tăssəba n-a-wen-dăy a făl dăy-wăń ărhey ad-tăbdəwăń d-erk imojjan-năwăń iket-dăy-năsăń, əbdəwăt d-a-wa isamăđasăń tiyəswen-năwăń d-iba n-tăşədje d-derhan dăryalăń d-derhan ăsisakăyăń, tărha n-hărăt-i wărăt tăzley d-ălyibadăt n-ăşşăńnămăń. ⁶Tăssəba n-hărătăń-win-dăy a făl dd-izizəbbut Măssinắy ăşşar-net [făll-ăddinăt wi has-ănimăşräyinen]. ⁷Hărătăń-win-dăy a-s kăla tăń-tamaşalăń kăwăneď-dăy a-s tătăfăm tămudre-ten-dăy ⁸măšan, āmăra, əbdəwăt dăr-săń iket-dăy-năsăń, wär tăń-tolesăń amişăł. Äyyăt fălla-wăń ađkăr d-tukăse n-ulh d-tăllăbăst d-tizmiten, wär săfălyayăt, ⁹wär tinmənnit buhu jer-iman-năwăń kăwăneď-i əbdănen d-tasna-năwăń ta-dăy ănnihăđ abăkkăd d-timaşalen-net, ¹⁰ed āmăra, tălsăń tasna ta tăynayăt-i s-Măssinắy-i n-Ămaxlak-năńăy a hawăń-tăt-ikfăń, isaynay-tăt dăy hărkuč dăy-tăssəba n-ad-t-tăknəm muzəyăt, taləhəm dăr-s.

¹¹Dăy-tasna ta-hi tăynayăt, wär-izley wa n-Ălyunan d-wa n-ăgg-Ălyăhud; wär-izley wa ămelăyăń d-wa wărăń ămelăy; wär-izley wa n-ănăżżalim d-wa n-ălžahil; wär-izley elăll d-akli, ăbas t-illa ar Ālmasex,* ənta a-s hărăt dăy-hărăt iket-net.

Yaymät tinmədhiläm jer-iman-năwän

¹² Šämad äddinät äsinäfrän Mässinäy a tămoosäm, ij'-iwän iməssheddejän s-tətbat tärha ta hawän-ija, adiš, nəmədənət tăhanint kăwăneđ-däy jer-iman-năwän, tənmədhəläm jer-iman-năwän, isärəset hak iyyän iman-net dat-amidi-net, iżadät jer-iman-năwän, tənməzəzzəydäräm, ¹³ tənməşmäräm, tənmənşəm jer-iman-năwän; ere s-iyşäd ăŋŋa-s hărăt-däy, ănşet-as-in s-əmmək wa s-hawän-inşa Emäli.

¹⁴ Ajät jənnəj-a-wen-däy iket-net anmärh imdan jere-wän ed ənta a dd-itiirəwən tartit təmdat. ¹⁵ Äyyät ălyafyät wa ihäkk Älmasex* ad-ənnähäđ däy-ulhawän-năwän ed ənta a kăwän-dd-iyrän s-ălyafyät-wen-däy, issärtäy-kăwän i-ad-tumasäm tiyyät tayəssa, tumayät i-Mässinäy. ¹⁶ Ijatet mäjräd wa n-Älmasex jere-wän s-särho, tənməkfəm tayətte, tənməkkəsäm däy-taydärt s-särho imdan, taməläm Mässinäy s-ulhawän əmdanen, tumayäm-as s-təmmalen dd-əzjarnen əlkəttab wa n-Āzzäbur d-təmmalen janen fäll-tuksəđa n-Mässinäy d-isuhay dd-oraw sär-wän Unfas Şaddijän* i-ad-sär-sän taməläm Mässinäy.

¹⁷ A jənnem d-a tajjäm-däy, ajät-t däy-derhan n-ad-səmyäräm isəm n-Emäli Yisa* däy-a-s tumayäm i-Abba Mässinäy däy-təssəba n-isəm wa n-Yisa.

Ejädäš wa n-ălmässexitän

¹⁸ Tideđen! Särəsmät iman-näkmät dat-meddən-näkmät s-a-wa ănhäjjän ed a-wen-däy a ijražän i-Emäli.

¹⁹ Meddən! Ārhet hak iyyän däy-wän hänne-s, wär təssəsmämäm fälla-snärt.

²⁰ Aratän! Säjdät i-imärawän-năwän däy-hărăt iket-net ed a-wen-däy a ijražän i-Emäli.

²¹ Abbatän! Wär tăzzäkănzäräm aratän-năwän i-ad-wär fällawän wär-ănxesän iman-năsän.

²² Eklan! Säjdät i-wi kăwän-lănen däy-ăddunya-ta-däy däy-hărăt iket-net, wădden dihad kăwän-hannäyän yas däy-ittus n-ad-kăwän-aməlän, ănn-ak, jer-hannäyän-kăwän wăla, ăknät əşşäyəl-năwän s-ulh ijlayän däy-tuksəđa n-Emäli. ²³ Əşşäyəl hăm-däy, ajät-t s-ənniyät imdan šund Emäli a-s tăxdamäm wădden dägg-adəm, ²⁴ ălhäk wa s-ilkam ad-t-təjrəwäm, itwar-awän-t Emäli däy-işənnawän. Älmasex* a-s Emäli, umasät eklan-net ²⁵ făl-a-s, ere iydärän däy-a-wa iha, ilkam däy-s ad-ijrəw ălxaqq n-taydärt-net ed Mässinäy ya, wär-izley äddinät.

4 Məssaw-s n-eklan! Ājät i-eklan-năwän a-wa olăyän d-a-wa oyădän dăy-a-s təssanäm a-s kăwăneđ-dăy, lam Măssi-wän, iha ālžănnät, dăy-işənnawän.

Infəşet Ālənžil fäll-ärori n-ăkall

²Təddalăt Măssinäy hărkuč, əjləyät hullan dăy-a-wen, ăkfăt Măssinäy semyar, tumayäm-as. ³Təddalăt-anăy-in năkkăneđ-dăy i-ad-hanăy-ijrəw Măssinäy taşləlt s-năxtăb i-ăddinät isălan n-Ālənžil,* nəsəfhəm-tän əddəraqj n-Ālmasex* wa hasän-ăttunkälän s-aşăl-i-dăy, ănfalăl-dd ălmăyna-net ed dăy-təssəba n-iji n-isălan-en-dăy a făl hey tişəm. ⁴Təddalăt-ah'-in Măssinäy i-ad-xaṭṭăbăy isălan-en-dăy s-əmmək iknan asəjrəh ed a-wen-dăy a hi-iwarän. ⁵Iwăret-kăwän sărho jer-ăddinät wi n-ajama wăren əzzey Yisa* Ālmasex,* taşləlt təjrăwäm-dăy, ăjät-asän isălan-net; təyyəm făllawän a-wa wăr-iha ălfăyda. ⁶E-d tažăwwabäm i-ăddinät dăy-isălan n-Yisa Ālmasex, ăjät-asän măjrăd ăzedän, ilan temde, təlmədäm day a-wa jännem i-hăk ăwadəm.

Tihulawen d-ajilal n-măjrăd

⁷Dăy-a-wa hi-dd-iqqălän năkk, isălan-nin, ad-dăy-wän tän-ăj ănjə-y wa əkney tărha Tušik. Nohar năkk hakd ənta ălxidmät wa hanăy-issăylăf Emăli, ăjjəyhăy a-s iýdal dăy-a-wa ităjj iket-net. ⁸Năkk iman-in a hawän-t-in-ăssokän i-ad-hawän-ăj isălan-nănăy, isəsmăd ulhawän-năwän. ⁹Āsiidăwăy-t-in d-Unažəm wa n-ălkănisät*-năwän, ănjə-y n-ămaydal əkney tărha a ămoos ənta-dăy. A dăy-wän əjən isălan n-a-wa ijən diha-dăy iket-net.

¹⁰Āhuul-kăwän-in amidi-nin Aristarăq-i dăr-oharăy takărmut, ăhuul-kăwän-in day Marqəs wa n-ara n-meddən n-Bărnăbbas. Ənta-en-dăy a-s ăru d-kăwän-ăsmätărăy dăr-s, a-s hawän-ənney, afăl kăwän-in-osa, səbbələlət-t. ¹¹Āhuul-kăwän-in Yisa wa itawăyren s-isəm Istus. Meddən-wi-dăy n-kărađ ȳas dăy-dăgg-Ālyăhud wi n-ălmăssexitän, a hi-ədhălnen a ija a-wa-dăy dăy-ălxidmät wa hey i-ad-tətbət Təmmənəya n-Măssinäy,* ijmađ-t ăşşək a-s əknän asəsmađ n-ulh-in.

¹²Āhuul-kăwän-in Ibbafras wa n-ănaxdim n-Ālmasex,* ənta-dăy, i n-ălkănisät* tədi-dăy-năwän. Itajăynan hărkuč dat-Măssinäy i-ad-təbdadäm dăy-immun, wăr t-illa ălyib kăwän-iwarän i-ad-təlmədäm erhet n-Măssinäy iket-net. ¹³Ājjəyhăy i-əddəgozăt wa ija dăy-təssəba-năwän kăwăneđ d-kăl-Lăwdisa d-kăl-Irabolis. ¹⁴Āhuul-kăwän-in Luqa wa n-lăxtur nəkna tărha, ăhuul-kăwän-in day Dimas.

¹⁵Tăhuulăm-anăy-in ayətma-năy wi hănen ayṛəm wa n-Lăwdisa, tăhuulăm-in day Ninfa d-ălkănisät ta tažămmayăt dăy-ehăn-net.

¹⁶Afäl yur-wän tätwäyra tăkarde-ta-däy, äjät əmmək fäl tätwäyra day däy-ălkănisät ta n-kăl-Lăwdisa, tăyrəm day ta tän-dd-madät-təfəl sär-wän. ¹⁷Annät-ahi i-Aršibb, ənney-as: «Hekäyy! Äj ənniyät i-ămaşal wa kăy-issäyläf Emäli, aqəd däy-s.»

¹⁸Edägg-wa-däy däy-tăkarde-ta-däy, năkk iman-in Buləs a t-iktăbăń s-ăfuss-in: «Năkk, Buləs, ăhuuläy-kăwän-in.» Kittəwăt-dd a-s năkk ya, takärmut a hey.

Issənsä fälla-wän Măssinäy ănnuymăt-net. Amin!